




8













5.  
I. N. 3.

DISPUTATIO JURIDICA,

DE TESTIUM  
PUGNA,

Quam

AUXILIANTE DIVINO NUMINE

EX DECRETO AMPLISSIMI SENATUS  
ACADEMICI,

SECUNDUM STATUTA,

PRO LOCO

PROFESSIONIS TERTIÆ ORDINARIÆ,

*Publicæ eruditorum disquisitioni*

*subjicit*

JOHANNES Stein /

J. U. D.

RESPONDENTE

ANDREA HEDIONE,

Phil. atque LL. Stud.

*Ad d. 21. Maji. An. M DC XCIV.*

*Horis ante & pomeridianis.*

---

REGIOMONTI, TYPIS REUSNERIANIS.



AUGUSTO,  
SERENISSIMO *atque* POTENTISSIMO  
PRINCIPI & DOMINO,  
DOMINO  
FRIDERICO  
TERTIO,

MARCHIONI BRANDENBURGICO,  
SACRI ROM. IMPERII ARCHICAMERARIO  
ET PRINCIPI ELECTORI,  
PRUSSIÆ, MAGDEBURGI, CLIVIÆ, JULIÆ, MON-  
TIUM, STETINI, POMERANORUM, CASSUBIORUM,  
VANDALORUM, IN SILESIA, CROSNÆ,  
SCHWIBUSSIQVE

DU CI,  
BURGGRABIO NORIMBERGENSI,  
PRINCIPI HALBERSTADII, MINDÆ ET  
CAMINI,  
COMITI AB HOHENZOLLERN, MARCÆ  
ET RAVENSBERGÆ,  
DOMINO RAVENSTEINII, NEC NON TERRARUM  
LAUENBURGI ET BUTOVII, &c. &c. &c.  
PIO, FELICI, INCLITO  
PRINCIPI,

*Domino meo Clementissimo,*

Hanc de pugna testium Disputationem cum calidissimo  
felicitis semper adversus hostes pugnae, victoriæ omni-  
genæque prosperitatis voto

*offerre & dedicat*

JOH. Stein/ D.





Testibus haud minorem ac instrumen-  
tis fidem esse tribuendam constat ex  
l. 15. C. de fide instrument. modò duo  
vel tres idem asseverent l. 12. ff. de  
testib. c. 4. & 23. x. eod. & in unum  
conspirent rei finem l. 16. C. de pœnis. *VVes. in commen-  
tar. ad digest. de Testib. n. 6.* Si verò testes singulares  
sunt, quales propriè illi dicuntur, qui in depositione  
sua contestes non habent, sed qui illa deponunt, quæ  
ipsi soli sciunt, reliqui ignorant, vel non eòdem mo-  
dò deponunt, *sicut eosdem describit Farinacius de testib.*  
*lib. 3. Tit. 7. Quæst. 64. n. 28.* contrarium statuendum,  
adeò ut mille minus probent quàm unus, cum alter  
alterius fidem debilitet. *Carpz. in process. Jur. Tit. 13.*  
*Art. 3. n. 45.* Non igitur credendum testibus, quo-  
rum unus ferrò alter clavâ homicidium perpetratum,  
unus Titium alter Mævium obtruncatum esse dicit,  
diversitas enim in re vel persona maximam inducit  
singularitatem. *Farinac. de test. cit. loc. n. 11. & 12.*  
Idem de diversitate in loco vel tempore Judicium fe-  
rendum. Modò locus & tempus ad substantiam actus  
pertineant *Carpz. J Prud. for. part. 1. const. 16. def. 41.*  
*n. 1.* Sic in actione injuriarum tempus & locus ex-  
primantur necesse est. Si igitur alter ex testibus inju-  
riam in foro, alter domi, alter die, alter nocte illatam  
esse asseveret, testimonium rejicitur. *Berlich. part. 1.*  
*concl. 36. n. 132. seq.* Si autem hæ circumstantiæ sub-



stantiam actus non ingrediuntur, testes singulares  
conjunguntur, unamque plenam probationem effi-  
ciunt. Unde si unus testis de confessione debitoris cer-  
tò locò vel tempore, alius de confessione alio loco ve-  
tempore facta deponat, hæ binæ extrajudiciales con-  
fessiones & semiplenæ probationes ad unam plenam  
faciendam combinantur. Ratio est, quia hæ testium  
depositiones ad unum eundemque finem scilicet ad  
probandam debitoris confessionem tendunt. Quo-  
tiescunque autem testes ad eundem finem conspirant  
plenè probant l. 16. C. de pœnis. Gail. lib. 2. obs. 66. n. 11  
& 12. Rauchbar. part. 2. qu. 5. n. 5. Farinac. lib. 3. t. 7. qu. 64. n. 146. seq. Berlich. cit. loc. n. 129. seq. Sola enim  
testium diversitas circa negotii substantialia fiden-  
eorum tollit, Farinac. lib. 3. t. 7. qu. 65. n. 16. seqq. Neq-  
testium diversitas nocet, si quid in genere proban-  
dum. Hinc Jurisdictio in genere satis probata esse  
censetur, si unus de meri alter de mixti imperii actu  
deponat, modò de certa Jurisdictionis specie non  
contendatur: ad merum enim imperium probandum  
hæc testium depositio non sufficit, cum singularita-  
tem sapiat. Ita cap. 9. x. de probat. explicandum. Gail.  
cit. loc. n. 12. Carpzov. d. defin. 41. n. 2. seqq. Farinac. lib.  
3. t. 7. qu. 64. n. 189. Brunn. in commentar. ad Pand. ad  
l. 21. de test. n. 8. seq. Mascard. de probat. vol. 2. concl. 749.  
num. 23. Mynsinger. centur. 3. obs. 76. Modest. Pistor. p. 1.  
qu. 50. in fin. Carpz. l. 3. tit. 7. resp. 66. n. 14. & 15. Ubi  
inter singularitatem obstativam vel diversificativam



& adminiculativam distinguit, & illam non hanc testimonium fidem evertere adstruit *Carpzov. cit. loc. n. 9.* Si testimonium contrarietas non est evidens, iudicis prudentis est, ut dicta illorum examinet, eaque conciliare studeat. *cap. 16. x. de testib.* partim quia in dubio benigniorem interpretationem sequi oportet, verbaque ita explicanda sunt, ut actus valeat potius quam pereat, *cap. 25. vers. profectò sic intelligenda sunt illa verba x. de verb. signif. cap. 6. ibi: unde tamen intelligatur eò modò, quò magis posset valere x. de fide instrument.* partim ne testes producens probatione, cujus magnus favor est, destituatur. *l. 22. ff. de testib.* partim ne testes perjurii reatu notentur *d. cap. 16. x. de testib.* Itaque si testes de diverso tempore deposuerunt, puta unus de sex alter de septem annis, non sunt discordes habendi, quia ille testis, qui dixit de sex annis, non negavit de septem, & saltem conveniunt in minori tempore, *l. 27. §. 3. ff. de recept. qui arbitr. receper. Farinac. lib. 3. t. 7. qu. 65. n. 73. seqq. & n. 251. Carpzov. JPrud. for. part. 1. const. 16. def. 42. & in process. jur. tit. 13. a. 3. n. 48. seqq. & lib. 3. tit. 9. resp. 95. n. 1. seqq.* Si autem testes ita sibi contradicunt, ut ad concordiam redigi nequeant, quorumnam dictis major fides habenda sit, queri solet? Cui ut satisfiat quaestioni, partim ad testimonium qualitatem, partim ad numerum, partim ad dicta illorum respiciendum. Quoad qualitatem observanda est

**Prima thesis: in testimonium conflictu di-**



gnioribus plus fidei tribuendum,  
quam humilioribus.

**P**robatur l. 3. pr. l. 21. §. 2. & 3. ff. de testib. Nov. 90.  
cap. 1. cap. 32. ibi: ad multitudinem tantum respicere  
non oportet sed ad testium qualitatem. x. de testib. l. fin.  
ff. de fid. instrum. Struv. Exercit. 28. th. 49. Busius ad l.  
21. ff. de testib. n. 1. Carpzov. Iurisp. for. part. 1. constit. 16.  
def. 43. n. 4. Ratio consistit in præsumptione, quam  
jura de honoratorum fide habent: Hinc magis No-  
bili quam rustico, magis Doctori quam non Doctori  
creditur. Farinac. l. 3. t. 7. qu. 65. n. 115. & 118. Sic &  
Clerici præ laicis fidem merentur arg. can. Monachus  
9. distinct. 77. Felin. ad cap. 32. x. de test. n. 1. Idque  
non solum procedit, si honestiores reliquis sunt nu-  
mero pares, sed etiam si pauciores, quia non tam  
multitudo considerata, quam fides & auctoritate te-  
stium. l. 21. in fin. de testib. cap. 32. x. d. t. Carpz. cit. loc.  
n. 5. & 6. Brunnem. ad l. 21. ff. de testib. n. 7. Sic pauci no-  
biles multis rusticis præferuntur. arg. l. 3. pr. ff. de testib.  
& glossa ad can. monachus 9. distinct. 77. dicit, quod tan-  
tum valeat testimonium quatuor clericorum, quan-  
tum sex laicorum. Felin. ad cap. in nostra 32. n. 1. & 11.  
Modò (1) dignitas præfulgeat notabilis, non enim  
quævis parva testium dignitas prævalet. (2) humiliores  
modicò numerò digniores excedant; secus si magnus  
testium humiliorum numerus digniorum seriem supe-  
rat. Farinac. l. 3. tit. 7. quæst. 65. n. 121. 122. & 123. Brunnem.  
ad l. 21. ff. de testib. n. 7. Numerus enim quandoque  
defe-



defectum qualitatis supplet. *Farinac. cit. loc. n. 125. in fin. (3.)* Si vitæ honestas dignitati non respondet, contra inferioris conditionis testes bonis moribus imbuti, hi illis præferuntur. *Farinac. cit. loc. n. 116. (4)* Tunc quoque humilioribus debetur prærogativa, si illorum dicta in favorem rei inclinant, digniorum verò attestata eundem gravant. *Farinac. all. loc. n. 126.* Ex hac thesi fluit

## Secunda: Masculis major quam foeminis fides habetur.

**A**Ntequam hujus regulæ explicationem aggrediamur, observandum est, quod mulier Jure Civili in omnibus causis tam civilibus quam criminalibus ut idonea testis producat. *L. 18. ff. de testib. l. 20. §. 6. ff. Qui testam. fac. poss. arg. l. 3. §. 5. ff. de testib.* in qua mulier palam corporis quæstum faciens à testimonio repellitur. Inde colligitur, quod si honestæ vitæ & integre existimationis sit, testificari possit. *Felin. ad cap. quoniam. 3. x. de testib. Hartmannus Hartmanni lib. 2. tit. 15. observ. 4. n. 1.* Excipiuntur tamen testamenta, à quibus foemina ob solennitatem arcetur *d. l. 20. §. 6. ff. Qui testam. fac. poss. §. 6 l. de testam. ordin.* A codicillis foemina non removetur. *arg. d. l. 20. §. 6. ff. Qui testam. fac. poss.* nec à testamento Parentum inter liberos. *Jus Prut. lib. 1. tit. 35. art. 8. §. 16.* nec si ad pias causas factum, vel militare fuerit. His enim testamenti generibus solennitates Juris Civilis remissæ. Idem de



alia ultima voluntate minus solenni ut donatione  
mortis causa iudicium ferendum. *Farinac. de testib. lib. 2.*  
*tit. 6. qu. 59. n. 55. seqq. Felin. ad dict. cap. Quoniam. 3. n. 2.*  
*et 3. Hartm. Hartmann. lib. 2. tit. 15. obs. 5.* Excipiuntur  
porro causæ feudales 2. *F. 32. ibi: præter fœminas.* in qui-  
bus fœminæ testificari nequeunt, partim quia in illis  
testes non nudæ probationis sed & solennitatis causa  
interveniant. 2. *F. 32. pr. ibi: sine hac solennitate,* partim  
quia feuda intuitu militiæ, cuius mulier nullam habet  
communione, dantur, partim quia investituræ in  
coetu virorum celebrari solent, cui mulierem interesse  
sexus pudori non convenit. *L. 1. §. 5. ff. de Postuland.*  
*Ludv. in Synops. feud. cap. 8. pag. 142.* Jure Canonico  
mulierem in causis Civilibus ut testem admitti conce-  
dunt Canonistæ, quorum magnam enumerat seriem  
*Farinac. lib. 2. tit. 6. qu. 59. n. 32.* ast in Criminalibus com-  
muniter negant per *cap. 10. ibi: Si vir non fœmina. x. de*  
*Verb. signif. can. 17. caus. 33. qu. 5. Felin. ad cap. quoniam. 3.*  
*x. de Testib. n. 1. Farinac. lib. 2. tit. 6. qu. 59. n. 1. ibique*  
*alleg. Hartm. Hartmann. lib. 2. tit. 15. obs. 4. n. 2.* Verum  
quod Jure Canonico quoque in causis criminalibus  
fœmina ad dicendum testimonium admittatur, satis  
docent *can. 2. caus. 15. qu. 3. cap. 3. et 33. x. de testib.* Qui  
textus non nisi per interpretationem violentam à Ca-  
nonistis ad istum detorquentur casum, si in causa cri-  
minali civiliter agitur, *vid. Felin. cit. loc. Farinac. d.*  
*qu. 59. n. 5.* Non enim negari potest, quod *cap. 3. x.*  
*de testib.* de facinoribus Presbyteri probandis in ge-  
nere



nere loquatur. Citatus autem *can. 2. caus. 15. qu. 3.* tam  
universalis est, ut *Felinus all. loc. n. 1. in fin.* ceteroqui  
contrarius fateatur, per d. canonem *Legem 18. ff. de*  
*testibus* esse canonizatam, cum de verbo ad verbum  
in *all. can.* sit translata. Ad *can. 17. caus. 33. qu. 5. &*  
*cap. 10. x. de Verb. sign.* responderi potest, quod mulier  
non simpliciter testis esse prohibeatur, sed solum pro  
teste non omni exceptione majori habeatur. *Berger.*  
*ad compend. Lauterb. de testib. qu. 2. Zoef. in commentar.*  
*ad Pand. de testib. n. 5.* Jure *Prut.* mulier in delictis  
non nisi in subsidium testimonium perhibere potest.  
*lib. 1. tit. 35. art. 8. §. 16.* De illis igitur casibus, quibus  
foemina testis esse potest, thesis intelligenda, quod si  
inter illam & masculum pugna existat, testimonium  
masculi præferatur. *L. fin. ff. de fide instrum.* quod ob  
dignitatem sexus virilis receptum. *L. 1. pr. ff. de Sena-*  
*tor. l. 9. ff. de statu homin. Bald. ad l. fin. ff. de fide instrum.*  
*Gotbofr. ad d. l. fin. lit. C. Abb. in cap. forus 10. x. de V. S.*  
*Felin. in cap. Quoniam. 3. x. de testib. Brumm. ad l. 2. & 3.*  
*ff. de testib. n. 2. Carpzov. lib. 3. tit. 9. resp. 95. n. 4.* sup-  
ponenda tamen est paritas in testium numero & per-  
sonarum qualitate; si enim mulieres masculos nume-  
rò vincunt, vel si mulieres integræ sunt existimatio-  
nis, masculorum autem fides per vitam dissolutam,  
suspecta reddita, mulieribus potius credendum. *Fa-*  
*rinac. lib. 2. tit. 6. qu. 59. n. 49. & 51. & lib. 3. tit. 7. qu. 65.*  
*n. 182.* Limitanda quoque est thesis, si foeminae de-  
ponunt pro reo, masculi pro actore, illæ pro innocen-  
tia,



tia, hi pro reatu, foeminarum dicta favore innocentie  
præferuntur. *Farinac. d. qu. 59. n. 53. & d. qu. 65. n. 181.*

### Tertia: Seniores præferuntur Junioribus.

**A**rg. l. 16. ibi: *vel etate. ff. de accusat. Carpz. part. 1. c. 16. def. 42. n. 4. Felin. ad cap. In nostra 32. n. 12.* quod ita ob auctoritatem & constantiam senum receptum, quippe qui Judicii firmitate juvenes antecellere censentur. Limitat regulam *Farinacius lib. 3. tit. 7. qu. 65. n. 176.* eamque non procedere dicit, si testes juniores dignitate senes præcedunt.

### Quarta: Ad ditiorum magis quam egenorum testimonium respiciendum.

**L.** 3. pr. ibi: *an locuples vel egens ff. de testib. Nov. 90. c. 1. ibi: aut divitiarum. can. 3. §. testium fides caus. 4. qu. 3.* Haud quidem pauperes à testimonio penitus repelluntur, *cap. 8. x. de testib. Jus Prut. lib. 1. tit. 35. art. 8. §. 17.* quia paupertas non est ex genere maiorum, nec ulla animadversio digna existimatur, neque testimonii fides ex divitiis sed ex vitæ integritate morumque honestate pender. *arg. l. 21. §. 5. ff. de tutor. & curat. dat.* Cum tamen leges pauperem lucri aviditate capi & faciliè ad perjurium sollicitati præsumant. *L. 3. pr. ibi: Ut lucri causa quid faciliè admittat*



*mittat. ff. de testib. & frequentius accidat, ut pauperes*  
*quam divites corrumvantur, idcirco in testium con-*  
*flictu divitibus magis quam egenis creditur. Alber. in*  
*l. 3. ff. de testib. num. 5. Farinac. lib. 2. tit. 6. qu. 57. num. 35.*  
*Nisi egenus sit honestæ & inculpatae vitæ, tunc enim*  
*eiusdem fides per paupertatem non diminuitur. L. 3.*  
*pr. ibi: nam si careat suspitione testimonium, vel propter*  
*personam, à qua fertur, quod honesta sit, vel propter cau-*  
*sam, quod neque lucri causa sit, admittendus est ff. de te-*  
*stib. Idoneitas namque testis non ex facultatibus sed*  
*ex fide æstimatur. Farinac. cit. loc. n. 75. seqq. adeo*  
*ut si pauper virtuosus cum divite vitioso concurrat, illi*  
*magis quam huic fides sit habenda. Farinac. all. loc.*  
*n. 43. Quis autem pro paupere sit reputandus, inter*  
*Doctores non convenit? Gothofred. ad l. 3. pr. ff. de*  
*testib. lit. I. illum pauperem dici opinatur, qui minus*  
*quàm quinquaginta aureos habet per L. 10. ff. de ac-*  
*cusat. Quamvis autem hæc opinio eatenus vera sit,*  
*quatenus is, qui quinquaginta aureis destituitur, ab*  
*accusatione repellitur, qui casus est all. leg. 10. Atta-*  
*men quis extra illum casum pro paupere sit haben-*  
*dus, Judicis arbitrio committendum, cum nusquam*  
*in jure determinatum sit. arg. l. 1. in fin. ff. de jur. deliber.*  
*Judicis enim est, ut in æstimanda paupertate persona-*  
*rum qualitatem attendat. Si enim nobilis non plus*  
*habeat, quàm dives rusticus, pauper adhuc judican-*  
*dus est: & contrà si rusticus tantum possideat, quan-*  
*tum nobilis pauper, nonnunquàm dives censendus*  
*est,*



est, cum conditio rustici non tantas, quantas in nobili,  
requirat facultates. *Farinac. lib. 2. tit. 6. qu. 57. n. 93. & 94.*  
Hancque sententiam confirmat *Jus Prut. lib. 1. tit. 35.*  
*art. 8. §. 17.*

**Quinta :** Si testes ejusdem sunt estimationis & fidei, plures vincunt pauciores.

**C***Ap. 32. vers. mandamus. x. de testib. arg. cap. 57. ibi:*  
*ubi major numerus est, zelus major præsumatur. x.*  
*de electione. Ratio est in cap. 9. x. de probat. quod testibus*  
*numerò pluribus lux veritatis potius adsistat,*  
*& in cap. 21. x. de offic. & potestate jud. deleg. quod*  
*integrum sit judicium, quod plurimorum sententiis*  
*confirmatur. Carpzov. in process. jur. tit. 13. art. 3. n. 71.*  
*seqq. & in Jurispr. forens. part. 1. constit. 16. def. 45. & in*  
*responsis lib. 3. tit. 9. resp. 95. n. 5. & 13. Bus. ad l. 21. ff. de*  
*testib. n. 2. VVesenb. in commentar. ad Pand. n. 6. Myn-*  
*singer. centur. 4. obs. 38. Farinac. lib. 3. tit. 7. qu. 65. n. 107.*  
*ubi num. 108. & seqq. varias hujus regulæ limitatio-*  
*nes subjungit. Interdum evenit, ut testes numerò pa-*  
*res sibi contradicant, ubi sequentes theses observan-*  
*dæ sunt.*

**Sexta :** Si probationes ab utraq; parte æquales, reus est absolvendus.

Favo-



**F**avorabiliores enim sunt partes rei quàm actoris.  
*L. 125. ff. de R. l. & faciliorem oportet esse judicem ad absolvendum quàm ad condemnandum. cap. 3. x. de probat. cap. 6. in fin. x. de fide instrument. l. 47. ff. de obl. & act. Wesenb. in comment. ad Pand. de testib. n. 6. Carpzov. in JPrud. for. part. 1. constit. 16. def. 46. & in respons. lib. 3. tit. 9. respons. 95. n. 9. seq. & in process. iur. tit. 13. art. 3. n. 75. seq. Gail. de pignorat. obs. 22. n. 11. Brunnem. ad l. 21. de testib. n. 12.* Quod ipsum cum in civilibus procedat, multò magis in criminalibus obtinere debet, quippe in quibus probationes luce clariore requiruntur. *l. fin. C. de probat.* quæ tamen per testium pugnam valdè obscurantur. Hoc igitur casu potius pro innocentia quam reatu deponentibus credendum. *Farinac. lib. 3. tit. 7. qu. 65. n. 153.* ubi allegat *Roland. & Mascardum* dicentes: magis credendum esse testibus homicidium casu quàm dolo commissum asserentibus. Fallit thesis, si actoris causa ex ratione speciali favorabilior est, veluti si agitur de matrimonio, dote, libertate, testamento, si causæ viduarum, pupillorum, pauperum, aliarumque miserabilium personarum ventilantur, tunc non prævalet favor rei, sed pro actore pronunciandum. *L. 24. pr. & §. 1. ff. de manumiss. l. 38. pr. ff. de re judicat. l. 1. ff. solut. matrim. arg. l. un. C. Quando Imperat. inter pupillos vel viduas. Felin. ad cap. 32. x. de testib. n. 2. Carpzov. in Jurispr. for. part. 1. constit. 16. def. 46. n. 5. seq. & in process. iur. tit. 13. a. 3. n. 77. seq. Farinac. lib. 3. tit. 7. qu. 65. n. 162. & 188.*



Septima: Testes verisimilia deponentes præferuntur minus verisimilia dicentibus.

**L**. 21. §. 3. *ibi: quod natura negotii convenit, confirmabitq; judex motum animi sui ex argumentis & testimoniis, & quæ rei aptiora & vero proximiora esse compererit.* ff. de testib. Felin. ad cap. 32. x. de testib. num. 3. Mascard. de probat. vol. 3. concl. 1364. n. 8. Carpzov. in Jurispr. for. part. 1. constit. 16. def. 44. n. 2. seqq. & in process. Jur. tit. 13. art. 3. n. 62. seqq. Brunnem. ad l. 2. & 3. ff. de testib. n. 11. & ad l. 21. ff. d. t. n. 6. Dicuntur testes verisimiliora deponere, si illa, quæ asserunt, ipsi negotio, de quo agitur, sunt convenientiora, vel vero propria accedente præsertim probabili aliqua præsumptione. Carpzov. in Jurispr. forens. cit. def. 44. num. 3. Brunn. ad d. l. 21. de testib. n. 6. Sic veriora censentur, quæ sunt contra testium commoda, quia nemo facile suum jactare præsumitur. L. 25. pr. ff. de probat. nec pejerasse quisquam censetur, qui nullum ex testatione sua sentit emolumentum. arg. l. ult. C. Ad L. Jul. repetund. Carpzov. in process. Jur. tit. 13. a. 3. n. 65. In dubio itaque magis credendum est testibus adversus propria commoda testificantibus. Carpzov. in Jurispr. for. d. def. 44. n. 6. 7. 8. Sic etiam prærogativa relinquenda est testibus, illa quæ juri communi consonant, deponentibus, præ illis, qui contra jus commune testimonium



nium perhibent. *Felin. ad cap. 32. x. de testib. n. 3. v. g.*  
si quidam testes de bona hominis fama, alii de infamia deponunt, illis porius credendum, cum iura unumquemlibet virum bonum esse nec turpitudine vitæ maculatum præsumant. *Felin. cit. l. n. 12.* sic & testibus pro libertate fundi loquentibus major fides habenda, quam eundem servire sustinentibus, cum iura quemvis fundum liberum esse præsumant. *Farinac. lib. 3. tit. 7. qu. 65. n. 140. & 150.* Thesis procedit quoque in casu, quo testes verisimiliora deponentes numero minores sunt. *L. 21. §. 3. ibi: licet impari numero & ibi: non enim ad multitudinem respici oportet. ff. de testib.* modo verisimilitudo non sit longè petita, sed negotii, de quo agitur, indoli proximè conveniens, tantaque, ut iudex facile arbitrari possit, pauciores pluribus proferendos esse. *Farinac. cit. loc. n. 130. seqq.* Quod & tunc locum habet, si verisimiliora deponentes à reliquis dignitate superantur, verisimilitudo tamen proxima & immediata prævalet. *Farinac. loc. cit. n. 135. seqq.* In criminalibus dicta regula limitationem patitur, in quibus testes verisimilia deponentes quidem indicium ad inquirendum præbent, si tamen inquisitus producat testes pro innocentia, etiam minus verisimilia proferentes, poena dictari nequit *Farinac. cit. loc. num. 143.* Si testis impossibilia garrit, eaque se vidisse refert, quæ videre per rerum naturam non potuit, non solum nullam meretur fi-



dem, sed & ut falsi reus argui potest. *Farinac. all. loc.*  
*n. 144. & 148.*

**O**ctava: Testibus de negotio ejusq  
circumstantiis perfectam cognitio-  
nem habentibus major fides tri-  
buenda, quàm aliis plena rei cogni-  
tione destitutis.

**I**ta *Carpzov. lib. 3. tit. 9. resp. 95. num. 4. Felin. a.*  
*cap. 32. x. de testib. num. 10. in fin. Farinac. lib. 3. tit. 7.*  
*qu. 65. num. 165.* Ratio ex antecedenti regula patet  
quia totius facti & circumstantiarum gnarus verisimi-  
liora proferre potest. Sic & testi de arte sua, cujus  
peritus est, deponenti potior fides habenda, quàm  
imperito de eadem verba facienti. *Farinac. cit. loc.*  
*n. 187.* Sic Judici de actu ex officio gesto, mercator  
de commerciis, artifices de artificio, rusticus de agri-  
cultura loquenti, magis quam illarum rerum ignari  
credendum. Ad hanc regulam etiam pertinet, quod  
*Carpzovius tit. 13. a. 3. n. 64.* monet, quod testibus in  
specie potius quam in genere deponentibus sit cre-  
dendum. Illi enim de negotio magis informati esse  
censentur. Quod comprobatur *Farinac. all. loc. nu-*  
*mer. 179.*

ll. loc  
usq  
tio  
tri  
gni  
Nona: Testibus rationem sui asserti  
reddentibus major habenda est fi-  
des, quàm causam non adjicien-  
tibus.

lin. a  
tit. 7  
pater  
risim  
cujus  
quàn  
it. loc  
cator  
e agn  
gnat  
quo  
bus  
it cre  
ati eff  
c, m  
T estes nonnunquàm sui dicti rationem reddere co-  
guntur, aliàs non ut homines sed pecora testari  
dicuntur. *Baldus in l. edita. 3. C. de edend. illaque quæ*  
*proferunt, ipso jure nulla dicuntur. L. 4. C. de testib.*  
*& justam contra dicta ipsorum adversario exceptio-*  
*nem præbent. Jus Prut. lib. 1. tit. 35. art. 14. §. 6.* Quod  
ipsum tamen non est perpetuum sed sub distinctione  
intelligendum. Si testis deponit de illis, quæ juris  
sunt & magis intellectu percipiuntur quàm sensu ex-  
terno, necesse est ut causam sui asserti addat, etiamsi  
de illa non est interrogatus. *Farinac. lib. 3. tit. 7. qu. 70.*  
*num. 6. Felin. ad cap. 37. x. de testib. n. 3.* Sic testi su-  
per dominio interrogato & respondenti, Titium esse  
fundi dominum, non est credendum, talis enim co-  
gnitio non tam cadit in sensum quàm in intellectum.  
Unde titulum emptionis vel donationis aliumve, ex  
quo dominium ad Titium transiit, allegare tenetur.  
*Wissenbach. ad l. 4. C. de testib.* Ita & testis de Juris-  
dictione vel jure decimandi testimonium perhibens,  
causam scientiæ etiam non interrogatus adjicere te-  
netur. *Farinac. cit. loc. n. 71.* Sic testis super præscri-  
ptionis probatione productus si dixerit, quod Titius  
fun-



fundum Sempronianum præscripserit, producentem non juvat, nisi addat, quod viderit illum tanto tempore possedisse, quanto inducitur præscriptio. Si enim de objecto, quod intelligibile magis quam sensibile est, interrogatus, si causam facti adjiciat, ex qua scientia colligatur, rationem sufficientem exprimeretur; format enim ex causis in sensum incurrentibus conclusionem juris. *Felin. ad d. cap. cum causam 37. x. de testib.* Si autem testis deponit de illis quæ facti sunt, & quæ sensu corporeo immediate percipiuntur, non tenetur dicti sui rationem reddere. *Farinac. cit. loc. n. 93.* Nisi de causa à Judice interrogatus fuerit *cap. 37. x. de testib. ibique Felin. num. 3.* Si testis de homicidio interrogatus, & respondenti: Titium percussisse Sejum, fides est habenda, licet rationem sui asserti non adjiciat. *Farinac. all. loc. num. 106.* De causa verò quæsitus si respondeat, quod viderit strictum ens confodique Sejum, sufficientem rationem suppeditasse censetur. Idem est, si de injuria verbali alteri illata interrogatus dicat, se audivisse verba contumeliosa in Sejum effusa. Ratio enim illius testimonii tota in visu vel auditu & ita in sensu corporeo consistit. *Wissenbach. ad l. 4. C. de testib. Hahn. ad Wes. de testib. num. 6. verb. Idoneam reddam testimonii & scientiæ suæ causam.* Si autem ratio scientiæ non congruit dicto, vel idipsum quod testis dicit, ex ratione non concluditur, vel ratio eadem est

cum

cum testis dicto, v. g. scio, quia scio, vel scio quoniam  
ita est, vel quoniam nullus dubitat, vel quia sic omnes  
recensent, pro congrua & apta ratione haberi nequit,  
quia in ratione plus quàm in dicto esse, nec vaga, du-  
bia vel incerta, sed vel necessario vel probabiliter  
concludens esse debet. Sic pro congrua reputatur ra-  
tione, si quis dixerit, scio solutionem esse factam, quia  
præsens fui. Nam ex præsentia præsumitur intelligen-  
tia. *Klock. tom. 1. consil. 29. n. 314. Hahn. ad VVes. cit. loc.*  
*Farinac. lib. 3 tit. 7. qu. 70. n. 144. seqq.* Quamvis autem  
in illis casibus, qui facti sunt, & sensu externo percipi-  
untur, testis non nisi interrogatus rationem reddere  
teneatur, si tamen ultrò & non quæsitus eam suppedi-  
tet, major ipsi quàm testi rationem non adjicienti fides  
est tribuenda. *Farinac. cit. loc. n. 19. Bald. in L. Presbyte-*  
*ri 8. C. de episc. & cler. n. 14. Felin. ad c. 32. x. de testib. n. 10.*  
Dicta enim cum ratione veriora esse videntur. *Carpz. in*  
*Jurisprud. for. part. 1. constit. 16. def. 44. n. 5.*

**Decima: Testes oculati auritis, qui ab  
aliis se audivisse dicunt, fidem præ-  
ripiunt.**

**T**Estes de auditu alieno deponentes regulariter nul-  
lam merentur fidem *cap. 33. ibi: nihil esse contra*  
*Lucanum electum sufficienter ostensum nisi de auditu tan-*  
*tum & fama x. de testib. cap. 47. ibi: ne super hoc recipian-*



*tur de cetero testes de auditu. x. eod. ibiq. Hostiens. & ad.*  
*versus dicta illorum excipi potest Jus Prut. lib. 1. tit. 33.*  
*a. 14. §. 7. Ratio est, quia quilibet de proprio sensu de-*  
*ponere debet, quod in presentia sua gestum vel dictum.*  
*L. 18. ibi: sub presentia sua C. de testib. can. 15. caus. 3. qu. 9.*  
*Hartmannus Hartmanni lib. 2. tit. 15. obs. 3. n. 4. Carpz. in*  
*proc. jur. tit. 13. art. 3. n. 53. seqq. Farinac. lib. 3. tit. 7. qu. 69.*  
*n. 2. seqq. Hanc assertionem adeo veram esse dicit Fa-*  
*rinac. all. loc. n. 20. ut ne quidem testimonium de audi-*  
*tu alieno tunc valeat, si testis dicat, se audivisse à viro*  
*magnæ auctoritatis, cum fundet rationem suam in au-*  
*ctoritate aliena. Quin ne quidem in causa ceteroqui*  
*favorabili v. g. pia causa hoc Testimonium valere, do-*  
*cet idem Farinac. all. loc. n. 21. neq; tunc si fama concur-*  
*rat ob cap. 33. ibi: nisi de auditu tantum & fama x. de te-*  
*stibus. Farinac. cit. loc. n. 22. Quamvis enim hoc casu ex*  
*testimonio de auditu alieno præsumptio aliqualis oria-*  
*tur, illa tamen non est tanta, ut onus probandi in ad-*  
*versarium transferat. Farinac. all. loc. n. 34. seqq. quod*  
*multò magis in criminalibus, in quibus lucè clariore*  
*probationes exiguntur, obtinet, in quibus testes de au-*  
*ditu alieno non solum non probant, sed nec indicium*  
*ad torturam faciunt. Farinac. cit. loc. n. 9. & 14. Admit-*  
*tuntur tamen nonnunquam testes de auditu in causis*  
*difficillimæ probationis, ut in factis antiquis, de quorū*  
*memoria non facilè constat. L. 28. ff. de probat. ibiq. Go-*  
*thofr. lit. O. L. 2. §. 8. ff. de aqua & aq. pl. arc. Felin. ad c. 33.*  
*x. de*

x. de testib. n. 2. in fin. & ad cap. 47. num. 1. Hartmannus  
Hartmanni lib. 2. t. 15. obs. 3. n. 11. & 12. In hisce testes non  
de sua tantum memoria deponunt, sed audiendi sunt  
asserentes, se à majoribus audivisse ita factum esse, &  
huius rei publicam esse famam & opinionem eorum,  
qui cognitionem de re habent. Carpz. in proc. jur. tit. 13.  
a. 3. n. 60. & 61. vid. Hostiens. ad cap. 47. x. de testib. n. 2.  
Consanguinitas quoq; & affinitas nec non filiatio per  
testes de auditu probari possunt cap. 47. x. de testib. cum  
difficulter probentur. L. 83. ibi: non sub ea conditione in-  
stitutum videri, quæ in potestate ejus est. ff. de condit. &  
demonstr. Ut tamen testibus de auditu hisce casibus  
credatur, necesse est, ut (1) sint plures, qui ita deponunt.  
cap. 47. ibi: nec tamen, si unus à pluribus x. de testibus.  
(2) Illi quoque à quibus testes audiverunt, sint plures.  
d. cap. 47. ibi: ab antiquioribus quidem suis non utiq; ab  
uno, cum non sufficeret ille si viveret, sed duobus ad mi-  
nus. (3) ut testes sint personæ graves, fide dignæ &  
omni exceptione majores. d. cap. 47. ibi: Nisi fortè per-  
sonæ graves exiterint, quibus fides meritò sit habenda.  
(4) illi quoque, à quibus testes se audivisse dicunt, sint  
fide digni & omni exceptione majores d. cap. 47. ubi  
adjicitur ratio, quod absurdum sit, illos admitti, quo-  
rum repellerentur auctores: non enim plus copiar  
credendum quàm originali. (5) testes ante litem mo-  
tam se audivisse asserant d. cap. 47. ibi: & ante litem  
motam testificata didicerint. secus si ex lite instituta de-



mum cognitio orta. (6) Ipsi etiam se illud quod au-  
diverunt, credere dicant. *d. cap. 47. tit. 7. qu. 69. n. 75. seqq.*  
*esse. x. de testib. vid. Farinac. lib. 3. tit. 7. qu. 69. n. 75. seqq.*  
Quamvis autem in quibusdam casibus de auditu alie-  
no deponentibus credatur, si tamen testes oculati, i.e.  
tales qui contrarium se vidisse asseverant, producan-  
tur, his utpote de sensu proprio testimonium perhi-  
bentibus plus fidei tribuendum. *Struv. Exercit. 28.*  
*th. 49.* Testibus quoque deponentibus de actu, con-  
tractu, vel facto, cui ipsi interfuerunt, vel quod ipsi ab  
agentibus, contrahentibus vel delinquentibus audive-  
runt, quin plena fides sit habenda, non est dubitan-  
dum, cum non de auditu alieno sed proprio testificen-  
tur, & cognitionem, quam de re se habere asserunt,  
non ex relatione alterius sed proprio sensu percepe-  
rint. *Felin. ad cap. 33. x. de testib. n. 2. Farinac. lib. 3. tit. 7.*  
*qu. 69. n. 148.*

Undecima : Affirmantibus magis  
quàm negantibus credendum.

**B***erlich. part. 4. concl. 14. n. 26. Brunnem. ad l. 2. § 3. ff.*  
*de testib. n. 12. Ves. in comment. ad Pandect. de testib.*  
*n. 6.* Quod ampliant *Berlich. all. loc. & Farinac. lib. 3.*  
*tit. 7. qu. 65. n. 201.* ut procedat thesis, licet testes ne-  
gantes sint numero plures. Certius enim quid novit,  
qui id, quod agitur, affirmat, quam qui negat, cum ens  
melius inprimatur quam non ens. *Felin. ad cap. 32. x. de*  
*testib.*



*testib. n. 8.* Quin probatio factum negantis per rerum naturam nulla dicitur. *L. 23. C. de probat. l. 10. C. de non numerat. pecun. cap. 5. vers. porro. x. de renunciat. can. 2. caus. 6. qu. 5.* Quod tamen tantum procedit in negativa vaga, quæ cum non cadat in sensus, merito sui natura improbabilis dicitur. Secus dicendum (1) si coarctata locò & tempore. *L. 14. in fin. C. de contrah. & committ. stipul. Felin. cit. loc. n. 7. Farinac. all. loc. n. 222. seqq.* Sic testi neganti Titium primo Kal. Januar. Regiomonti fuisse credendum, si eodem tempore ipsum Hamburgi fuisse testificetur. *vid. §. II. in fin. l. de inutil. stipul.* cum idem corpus in diversis locis eodem tempore esse nequeat. (2) Fallit thesis, si negativa æquè in sensus incurrit sicut affirmativa, v. g. si testis frumentum non esse vitiosum dicat. *L. 1. C. de Canone frumentar. urbis Romæ.* vel si quis neget Titium esse mortuum, vel furiosum vel ægrotum. *Felin. ad cap. 32. x. de testib. num. 6.* (3) Si negativa cum affirmativa conjuncta. Ut si testis deponat, Sejum non possedisse fundum Tusculanum, cum Titius possederit. Nam duo in solidum eandem rem possidere nequeunt. *L. 5. §. ult. ff. Commodat. Felin. cit. loc. num. 8.* (4) Testibus artis peritis, magis creditur negantibus, quam imperitis affirmantibus. *Farinac. all. loc. num. 240.* (5) In causis criminalibus testibus delictum negantibus & pro rei defensione verba facientibus plus fidei tribuitur, quam pro accusato-

re



re affirmantibus. Quod favore innocentie ita receptum. *Berlich. part. 4. concl. 14. num. 26. & 27. Farinac. lib. 3. tit. 7. quest. 65. num. 154. & 234.* (6) Si pro negantibus juris præsumptio militat. Ut si quis servum vel hominem proprium esse, aut fundum vicinifundo servire negat. *Farinac. all. loc. num. 238.*

Duodecima: Si omnia paria esse videntur, ita ut neque testium qualitas, neque numerus, neque verisimilitudo depositionis, neque favor rei &c. præponderare videntur, Judicis prudentis arbitrio committitur, quibusnam testibus magis adstipuletur.

**L.** 3. §. 1. ibi: tu magis scire potes, quanta fides habenda sit testibus. *ff. de testibus. Busf. ad l. 16. ff. de testib. n. 5.* modò in sententia Judex causam exprimat, ob quam unius partis magis quàm alterius testibus adhæreat. *Farinac. lib. 3. tit. 7. qu. 65.* quod procedit, si pro actore pronunciat. Si enim reum absolvit, expressione causæ non est opus, cum in paritate probationis Judex pronior ad absolvendum quàm condemnandum esse debeat. *Felin. ad cap. 32. x. de testib. num. 2.*





639673 **Bibliotheca** 17000,-  
**P.P. Camaldulensium in Bielany**

Depozyt w Bibliotece Jagiellońskiej



06379

Q.III.8



